



Ferrolterra, 20 de setembro de 2011. ADEGA vén de presentar [alegacións \(291 Kb\)](#) ao proxecto da Demarcación de Costas para **"actuaciones en el entorno de la Frouxeira"**

. Estas "actuacións", camufladas como unha rexeneración ambiental, perseguen a humanización definitiva dun dos ecosistemas costeiros de maior singularidade e diversidade de Galiza. A praia e lagoa da Frouxeira acolle

5 figuras de protección

segundo a lexislación galega, estatal, europea e o tratado internacional RAMSAR. No entanto, a xestión deste fráxil espazo ten sido nefasta tanto por parte do estado (

[construción de aparcadoiros, paseos marítimos, xardíns, pistas](#)

,
[gabias](#)

...) como da Xunta ([sangrado da lagoa](#)

,
[urbanizacións, atentados patrimoniais](#)

) producindo nos últimos anos unha importante redución de hábitats prioritarios e a desnaturalización da lagoa da Frouxeira, un dos 5 humidaís de importancia internacional que temos no país. Este proxecto é máis do mesmo, coa agravante de desbaldir

6.291.442,95 €

do erario público. Para as desfeitas, non hai recortes: vaítes coa austeridade!

A responsabilidade deste despropósito recae na Demarcación de Costas promotora do proxecto, a quen corresponde a xestión do Dominio Público Marítimo-Terrestre, mais podería estenderse tamén á administración autonómica e local. As administracións deberan evitar accións de urbanización/humanización dos nosos espazos protexidos, máxime cando nestes hai importantes hábitats e especies en perigo de extinción. É a súa obriga legal vixiar pola conservación deste patrimonio público, que tamén pertence ás xeracións futuras. Xa que logo, os poderes públicos deberían buscar outros xeitos máis sustentábeis de xestionar o litoral que non sexa entrar co vehículo privado até os mesmos areais provocando severos impactos, algúns irreversíbeis, sobre os hábitats e especies protexidos..

Este proxecto de Costas está redactado á marxe da normativa de protección e dos obxectivos de conservación deste singular espazo natural, e formula propostas que conlevan a destrución de hábitats prioritarios, así como a perda de valiosísimas poboacións de especies protexidas.

Con estas actuacións tampouco se corríxen ningún dos problemas que afectan a este espazo, e menos aínda os relacionados co uso público e sustentábel da súa biodiversidade e paisaxe.

Eis algúns exemplos:

-Críanse novos aparcadoiros na Rede Natura 2000 que diminúen a extensión das dunas e aumentan a presión sobre o ecosistema.

-Trasládase o galpón da praia dos Botes para situalo sobre unha duna gris, un dos hábitats considerados de conservación prioritaria na Rede Natura..

-Ubícanse numerosas pasarelas sobre as dunas protexidas con especies vexetais en perigo de extinción como *Anthriscus majus* var. *linkianum*.

-Exprópiase e derrúbase unha edificación na praia grande (deixando a piscina existente) para erguer outro edificio aínda maior co mesmo uso e cun importante desembolso de fondos públicos.

-Críanse novas pradarías (un hábitat alleo) con xenotipos alóctonos e criterios máis propios dunha actuación de "axardinamento".

Creemos que un investimento de máis de 6.000.000 de euros para "humanizar" un espazo natural protexido con hábitats prioritarios e especies en perigo de extinción supón ademais un inxustificable e intolerábel desbaldimento de cartos públicos.

Dende ADEGA solicitamos a Costas a retirada deste proxecto por consideralo lesivo cos obxectivos de conservación deste espazo e á Xunta que informe negativamente sobre a súa realización por afectar a valores naturais cuxa protección está consagrada pola lexislación autonómica, estatal, europea e internacional. Tamén achegaremos aos organismos internacionais, Comisión Europea e sectorariado da convención RAMSAR, os detalles das

obras na Frouxeira para que tomen as oportunas medidas tendentes a garantir a conservación dos seus valores naturais.